

թեան դեմ եւ դաւաճանութեամբ ստացաւ արաբական ոստիկան Իսուֆից արքայական թագ: Նրա հիմնած դժբախտ թագաւորութիւնը տեւեց հարիւր տարուց մի փոքր անելի եւ ունեցաւ վեց թագաւորներ միայն: Դրանցից վերջինը, Սենեքերիմը, սաստիկ հարոածներ կրելով նոյնիսկ արաբացիներից եւ ապա թուրքերից, չկարողացաւ երկար դիմանալ եւ 1021 թին, իր հաճութեամբ, իր տերութիւնը յանձնեց յունաց Վասիլ կայսրին եւ նրա փոխարէն ստացաւ կայսրից Սեբաստիա քաղաքը իր գաւառներով: 14.000 ձիաւորներով գահազուրկ թագաւորը տեղափոխուեցաւ իր ստացած նոր երկիրը բնակութեան համար: Վասպուրականը դարձաւ յունական նահանգ:

Այն բոլորը, ինչ որ Սենեքերիմը ցուցակով յանձնեց յոյներին, հետեւեալն էր. 10 քաղաք, 72 բերդ եւ 4400 գիւղ: Նա յանձնեց յոյներին միայն վանքերն ու անապատները, որովհետեւ դրանք աստծոյ եւ ժողովրդի սեփականութիւնն էին: Վանքերի թիւը հասնում էր 900-ի, որոնցից 115-ը մեծամեծ մենաստաններ էին: Համեմատեցէ՛ք, թագաւորութիւնն իր երկրի պահպանութեան համար ուներ միայն 72 բերդ, իսկ աղօթելու համար՝ 900 վանքեր, լի բազմաթիւ կրօնաւորներով, որ միշտ քարոզում էին աշխարհի ունայնութիւնը...

Վասպուրականը յոյների ձեռքումն մնաց միայն 107 տարի, վերջը տիրեց Միրան անունով ամիրան եւ իրան կոչեց Շահ-արմեն, այսինքն թագաւոր հայոց:

ԺԳ. ԴԻԹԱԿԱՆ ԳԱԲԱՉԱՆԸ

Կեսրից բաւական անցել էր, երբ մենք հասանք Այգեստան. մարդիկ չէին երեւում, փողոցները համարեա թէ դատարկ էին: Դեռ շարունակոող տօթը քշել էր նրանց այգիների ու պարտեզների հովասուն ստոերների ներքոյ:

Անցնելով կարգով տնկած հովանաւոր ուռիների եւ բարդի ծառերի տակից, մենք մտանք այն փողոցը, որտեղ գտնուում էր վարպետ Փանոսի տունը: Այստեղ ինչ-որ աղմուկ էր լսում: Հեռոցից նշմարեցինք, փոշու ամպերի մէջ կորած, աղաղակելով, ճիչ բարձրացնելով, վազվզում էին մի խումբ երեխաներ: Երբ մօտեցանք, տեսարանը անելի պարզեցաւ: Երեխաները հալածում էին մի պառաւ կնոջ, որը նրանց առջեւից փախչելով, երբեմն կանգ էր առնում, սպառնալիքներ էր կարդում, եւ երեխաները, այդ լսելով, նոյնպէս կանգ էին առնում, փոքր-ինչ հանգստանում էին, իսկ երբ պառաւը շարունակում էր գնալ, փոքրիկ չարածիները կրկին աղաղակ էին բարձրացնում, շո-